

武夷九曲志 二

docriver 文川网
古籍书城
入驻商家
在文川网搜索古籍书城 获取更多电子书

武夷九曲志九卷

浙江錢塘王復禮艸堂編輯

江南嘉定陸廷燦扶照叅訂

九曲

靈峯又名白雲巖溪北三教峯右巍然雲際懸梯登絕頂

〔詩〕宋朱熹弄舟綠碧澗樓集靈峯阿夏木紛已成流
泉注驚波雲鬪破蒼茫高城鬱嵯峨脊言羽衣子俛
仰日婆娑不學飛仙術繫繫丘塚多

〔路徑〕自溪濱一徑深入經丘公巖踰小嶺逶迤而上

至峯腰有石峽疊石爲磴約百級有石門進此左折
達白雲菴

齊雲峯溪南高插霄漢靜夜時常見天燈

〔詩〕元鄭德普零句石潤黏蒼蘚澗高流白雲國朝程
澗溪源探盡見平川禾黍油油萬頃田到此莫嫌山
漸少齊雲峯勢欲摩天

寒巖又名丘公巖又名丘公洞溪北靈峯之麓相傳有
丘公者得道于此巖壁斜覆如屋中有泉一泓不竭

〔詩〕明謝上箴寒巖奇絕處仙觀綠陰遮突兀元雲表
躡躑曲水西冥濛飛瀑瀉淒切亂猿啼暫憇瓊宮樹

docsriver 文川网
入驻商家 古籍书城

在文川网搜索古籍书城 获取更多电子书

無勞白玉梯

〔隱元巖〕溪北石鱗窟之巖也

〔幃巖〕溪南八曲廩石之左橫亘數百尋四周陡壁狀如雲幃頂平曠無林木土人藝茶其上俗呼幃頂茶

〔路徑〕一從霞斐洲右循山峽踰小嶺登其頂一從更衣臺後亦可至

〔仙巖〕溪南幃巖左

〔路徑〕一由霞斐洲右踰小嶺陟本巖一由更衣臺後踰小嶺循雲巖左越仙巖之背至碧雲菴其徑絕險一由平林渡頭踰山坳循晚對峯亦至

雲巖溪南仙巖左其東北距四曲李仙巖不遠

詩明王應槐山如屏水如玉石洞嶽嶽倚溪曲雲來
通青霄雲去見巖麓萬里天風吹不斷白衣蒼狗空
中逐高人何事抱雲眠爲刷雲根結茅屋

路徑自更衣臺後南行約三里可達其頂

石鱗窟溪北繞靈峯左壁小徑入泝小澗三里許地甚
幽僻

毛竹洞溪北靈峯右巖壑幽邃毛竹茂密宋羽士王通
及知微子皆居此

詩宋李綱洞生毛竹綠猗猗枝幹扶疎滿洞垂傳是

羣仙遊息地，蔽藏不許外人知。
游九言毛竹連雲路，
欲迷洞門深鎖，落花遲會孫，
幾度春風老未了，仙人一局棋。

白雲洞溪北靈峯白雲菴後內藏小艇及蛻骨

詩國朝潘錦尋山不覺遠，興至轉蕭森，
奇石媚幽賞，白雲生道心，
天清松子落日夕，翠微深，
明發收餘眺，還聞鐘磬音，
李紹驥石洞藏茅屋，誰人此煉丹，
成仙去不返，惟有白雲還。

雲巖洞溪南雲巖有石室可容百人

香石溪北靈峯之下

揆人石溪北毛竹洞外行者側身而過石或搖動若揆人然

〔詩〕宋劉子寰零句今人自取捷徑行却嗔山石能揆人

飛來石溪南仙巖之半石極高峭

道院洲溪北九曲盡處昔有和陽道院因名

霞斐洲又名霞洲俗名蝦尾洲溪南仙巖之前泊于溪畔煙扉水碓曲屋小橋村居數家殊有逸致

〔路徑〕自藍巖石門出經蜈蚣鈴至此不遠

雲關溪北靈峯之腰有石峽疊石爲磴約百級有石門

名雲關

後溪溪北自棠嶺桃源洞一帶來凡七八里遠紫芝鼓子諸峯之背出白雲巖右匯于九曲

江墩溪溪南霞斐洲左自梨源左渠排屯諸村流二十餘里經橋下入九曲度橋而西則星村也

淺灘溪南幃巖相近

星渚渡又名星村渡在後溪山中往來必由此渡

儒林祠溪北九曲盡處元崇安詹總管天麟建與清江杜隱士本讀書其中今廢

萬卷書樓溪南平川元詹總管天麟建今廢

〔辨〕山志皆以爲詹景仁乃其字也茲據家譜改正

〔聘君宅〕在平川元杜隱士本建內有思學齋諸景今皆廢

〔詩元〕〔薩都刺〕夜宿武夷山乃識清碧叟清談道人同
險語山鬼走出門視河漢危梯掛星斗白露溥芙蓉
清寒夜深久○我識杜清碧深居武夷山采藥紫芝
嶺行歌白雲間天根深可躡月窟高可攀天子不
起道人閒往還〔傅若金〕武夷山中春浩浩疾風滿地
翻瑤草雲來九曲川欲平雨發千峯樹如掃谷口車
輪不能辨水邊茅屋終相保可憐鄉相多黑頭空谷

斯人著書老范曄徵君家住武夷山白鶴元猿夜扣
關船泛清冷凡九曲屋分丹碧只三間世人往往知
名姓仙子時時定品班孔壁秦灰天未喪幾多魚豕
待重刪明藍智濟時共惜臥龍才三詔頻煩顧草萊
宅近青山惟廢址書藏壞壁有殘灰當年奏稿何人
見落日寒鴉共客來世事推移遺老遠松風澗水有
餘哀傅汝舟不見平川杜伯原社烟村靄自朝昏藏
書小閣猶相望避世微言竟莫存拂意冠裳委草莽
怡情山水付兒孫清江碧嶂高風在夜雨寒燈獨掩
門羽士江一源幽探遠弔杜徵君衰草淒涼怨夕曛

謾憶儒林開館閣空留清碧刻詩文巖花半落名難
辨野蔓斜侵路莫分獨對蒼山搖落處蕭蕭千樹鎖
寒雲

懷友軒在聘君宅今廢

〔記〕元杜本予少時喜遊名山川聞武夷最勝而最遠
嘗按圖指畫擊几爲節咏九曲棹歌想昔人之餘韻
謂不得遂其願慕之心矣皇慶初元以御史大夫木
公薦在京師獲託姓名于四方之士于時張君伯起
以童子科校書秘省景仁詹君亦辟掾三公府暇輒
相從以問學切磋爲事景仁乃世家武夷嘗極道其

溪山高深環合千態萬狀有終身不得窮其趣者焉
而先世有田數十區有書數百卷足爲賓友之具以
徜徉乎其間得無有意于斯乎余聞識之延祐間景
仁出貳浙東憲幕伯起亦佐郡三白予以微言忤執
事之臣書不報而去乃能挾册山中償夙所願者蓋
二君之力也雖欲結茅溪濱而山石犖确自非仙人
道士餐霞茹芝乘風馭氣者罕得居之遂泝流而至
星村則開廓平衍有詹氏之故居然與市井相滙綜
又泝流而爲建峯皆良田水竹有類嵩邛鄜穀之間
稍憇息南湖之履堂始遇一儒者與叙語欣然若故

人周行未五里許平川廓然問之百年榛莽矣自九
曲至是僅半舍而遊者已罕至然水益深緩山益磅
礴其西南諸峯峻出霄漢其最峭拔者爲雲巖雲氣
起伏其下鄉人于此候雨暘焉天高氣肅時一登望
閩江之左右浙之東西三山海日七閩煙靄皆隱約
于指顧間武夷諸峯並列其下巖巒林壑澗谷洲渚
泉池潭洞層見叠出不可致詰無不稱觀者焉予顧
而樂之景仁遂贖其榛莽之區剗雜而藝植之擬卜
居而未暇乃卽其東偏先構堂室携妻與子讀書其
中而予之寓舍又得蒔地而蕃之植兩楹爲軒戶牖

簡朴藏修遊息在焉然每一俯仰之際輒思平生所
與交者皆海內名士或道德之高深或文章之雄雅
或政事之明達或翰墨之神奇或節操之堅峻或信
義之昭白或談論之流綜或考覈之精審或出處之
慎重或神情之間曠乃皆在于神京大府江湖之外
不得相覩以成其志寧不有所思耶尚幸舊有藏書
朝夕搜玩蓋六經載聖人之道與夫百家子史所錄
開極以來明聖之君昏暴之主忠良孝義貞節之士
酷虐貪穢之吏是非善惡之跡以及天官地志禮樂
制度律曆名數龜筮醫方營繕種藝方言野錄仙佛

變化之事附以崖鑿野刻塔寺宮廟彙鼎柱石井臼
墟墓詭異之辭悉次于是庶開卷而有得亦可謂益
者之友則雖親舊之交遠江海之迹疎然神會于文
字之間猶能友于千古况同一寰宇而並世者哉因
輯其詞翰列氏名而記之其出處存歿雖異然予之
所慕者不在于斯也

思學齋在聘君宅今廢

〔記〕元虞集予始識臨江杜伯原甫于京師也見其博
識多聞心愛重之間從之有問焉沛乎其應之無窮
也凡天文地理律曆名數神仙浮屠之說往往得諸

世外之士至于因人情時物之變以議論政治之術
可指諸掌時大臣有得其才而薦用于上未命而大
臣者卒事報聞伯原漠不介意方就客舍取詩書易
春秋悉去其傳註而繕書之慨然有直求聖賢之意
于簡冊之遺未幾去隱于武夷山中其友詹景仁父
力資之乃得肆志于所願學而予不及從之矣延祐
庚申予居愛在臨川伯原使人來告曰我著書究皇
極經世之旨予其來共講焉且曰我以思學名齋居
舊矣子爲我記之明年予免喪省墓于吳中將溯浙
踰嶠一就其約會有召命不果又四年景仁來京師

docsriver 文川网
入驻商家 古籍书城

在文川网搜索古籍书城 获取更多电子书

每以思學之記爲說予曰伯原高邁絕俗閒居山林無世事之奪其所就殆必過人遠甚予何足以言之予苟言之人之所知耳所不知者固不能言也他日見伯原授說而執筆焉猶未晚也景仁曰不可必有以復諸伯原乃試誦所聞焉古之所謂學者非他學也心學而已然其要也不出于仁義禮智之固有其見諸物雖極萬變亦未有出乎父子夫婦君臣長幼朋友之外者也故曰聖人者人倫之至而已聖人至而我未至故必學焉求其所以至則必思焉且何以至聖人哉于其言行而已耳言其言也行其行也然

而反諸心而未盡行求諸已而有未得是以有思固
非茫然無所于主而妄馳者也有爲之說者乃欲絕
去倫理措心如墻壁以待夫忽然之悟于一觸之覺
不亦殆乎今夫有事于思者如火之始然而烟鬱之
泉之始達而泥汨之草木之始生土石以軋之逮其
發也其畜固已艱矣故非高明之資有未易以遽徹
者也嘗聞之明睿所照與考索以至者不同夫明睿
則無所事乎思矣無思則幾乎聖人矣其始乃在于
完養而涵泳焉時至而化有非在我者不亦盛哉請
以是質諸伯原苟有取焉則因以爲記

正東山記 卷之
詩元王士熙武夷山色清于水君築高齋第幾峰北
苑鶯啼春煑茗西風鶴語夜巢松田家送酒芝香瀉
道士留書石髓封聞說牙籤三萬軸欲憑南雁約相
從

思紹齋又名思紹堂在聘君宅今廢

記明張智爲人後者惟善于繼述斯有足稱也夫前
人擅一代名後之人苟不能有以繼述之世業衰矣
繼述之道奈何亦惟飭身勵行進問學而致思聖道
行遠自邇紹續世休豈有不至者哉契家杜德基氏
是所謂有足稱者德基幼孤鞠于母氏稚齡向學卽

知慕其先大父清碧翁蓋翁學貫天人隱居武夷道
德才藝爲時公卿所景仰當有元之世君臣延攬旁
求遺逸遣使以翰林次對召比至再三翁方勉強出
至武林旋移疾還山嘗復丞相書有以萬事合爲一
理以萬民合爲一心以千載合爲一日以四海合爲
一家則可言制禮作樂而躋二帝三王之盛其辭微
矣暮年逍遙九曲高風清節直追嚴周輩流風餘韻
逮今猶存爲孫子者得不有興起者哉德基弱冠至
有立取友求師考德問業屹屹窮年歲思所以紹續
先業亦勤矣所居揭堂以思紹其爲人之賢可知邇

以旣寧邑司訓起復赴天官遷永嘉郡學謁予成均
出公卿大夫文章滿卷予受讀之其爲申思紹之義
至矣尚欲予一言卷左予何言哉清碧翁之名聞著
于昔者傳于今德基以順而志立矣予何言哉雖然
傳有曰思則得之又曰思貽父母令名必果則是學
行皆當致乎思乃克有成顏何人哉希之則是弗思
詎能致之乎夫惟克思紹則遂矣翁旣委祉于前爲
孫子克紹于後權輿由德基而未涯是固早夜當勉
旃予先君文臺公與翁交誼爲極深予弱齡以通家
子獲翁耳提面命之誨俯仰倏五十年餘九原不作

感慨係之矣德基別數年得遂簪盍之會智亦惟以
名堂之義爲之勉尚看亢大其宗也詩曰無念爾祖
聿修厥德庸書以識歲月永樂元年三月旣望彞倫
堂記

靜可書室又名靜可書堂溪南宋詹隱士琦建今廢

〔記〕宋徐幾予愛武夷佳山水且有佳友晚歲徙居焉
詹兄琦景韓久從予遊知其爲人孝弟忠信天資近
道聞詩書仁義之名言躍如也一日語予曰琦愛程
子云性靜可以爲學因名讀書之室曰靜可惟吾子
一言以發之是爲幸予因進而語之曰學者之于道

能于其性之所近以求從入之門于道可至子性靜
有志于學誰曰不可今夫利欲關進躁競馳逐者去
道日遠苟能收斂此心鞭逼向裏勿爲外物所動則
其本立矣故濂溪明道二先生發明爲學之要必言
靜者以大本所當先也然伊川先生教人又用敬不
用靜者以敬貫動靜該體用若只用靜恐都無事了
又失大本當先之意故曰敬則自虛靜又曰靜中須
有物始得必如是乃可言靜雖然靜謂之可者言僅
可而有所未盡之辭程伯子之云且以開學者從入
之門耳會其歸要其至則動靜無端陰陽無始聖人

之于天道脗合無間然也大學曰知止而后有定定而後能靜靜而後能安安而后能慮慮而后能得此古昔聖賢道學相傳之要旨請以主敬窮理爲吾子勉他時隱屏有人曰靜可學者顧不羨美歟

武夷山房又名見羅書院溪北後溪山坡上明萬曆時徐督學卽登建迎其師李中丞材講學于此及中丞卒遂肖像祀之

記明郭子章武夷山在建州之北道家稱十六洞天有宋南渡朱文公始構紫陽精舍于五曲之濱而武夷始著我明王文成公避奄瑾之難委蛇此中蹈海

以去萬曆中豐城李孟誠先生被讒謫居鎮海往來
茲山蓋修明朱子之學四方朋來屢滿戶外予兒建
亦從先生遊山中梵宇禪林僅僅足佇師徒先生稍
厭之仍還鎮海建南諸生謀築室留先生來告予予
與右丞劉靜之叅政徐獻和各蠲薪倡之魏建陽史
崇安二令和之諸文學儒生各醵金成之至凝土度
木專屬之倪生士和趙生光孚擇地九山之隙尋壑
經丘亦輿航未到處而止焉中爲堂堂前爲門兩翼
爲橫舍堂後爲燕寢階除牖闥頗稱爽塏荆扉橫籬
大似里區營于去臘七日巳于今秋望日先生題曰

武夷山房先生來謁予記余惟名山大川託重高賢
武夷之著始于文公繼以文成又繼以先生五百年
內三宅賢人蓋不爲不幸矣匪直茲山爲然也斯道
之明亦復如是三先生者非相與共明大學之道者
乎大學入門始于格物文公曰人心之靈莫不有知
又曰獨者人所不知已所獨知以靈訓知以知訓獨
深矣猶恐人心未悟也則又曰知猶識也遂使求內
者牽于情識逐物者深于多識究也不失之玄離則
失之記問王文成公有憂焉矯識歸良直述孟子之
言曰人之所不慮而知者其良知也蓋所以翼獨知

之訓而不使之流于識也其徒不察而認知作主未
窺天則率稱良知窵也猖狂自恣剖決藩籬不流于
禪那則流于放蕩李先生有憂焉指良歸宗而教之
曰知非體也必有所以爲之體者止爲宗修身爲本
蓋所以翼良知之訓而不使之流于蕩也如以其詞
則分堂析戶鼎立爲三窵其意指又同條其貫函三
爲一而三先生者同寓茲山雖閩楚吳越殊方宋明
異代其有功于吾道均也嗟乎文公當宋叔季立朝
不四十日正心誠意竟爲人主所厭文成雖豎殊勲
錫高爵至縛溲戍後足不得入長安行道之難如此

今海氛甚惡，屬國未救。先生昔自淮南借箸，廟灣已握兵粵。滇禽倭，廉池拓地，孟養葢肉，試之莫邪。起瘡之靈樞也。天如欲平治天下，耶則不宜令先生老此山房矣。

靈峯道院 又名元都觀。溪北靈峯，右麓兩巖環抱。中復平衍，有田疇數畝。元時里人余藥坡創建。太守李真嶠奏請易名元都觀。元翰林學士趙孟頫書額。久圯，明成化時羽士王道元重建。

詩明程銓 靈峯一望白雲多，誰共幽人采芰荷。九曲探源還我事，飄飄巾鳥映晴波。

docsriver 文川网
入驻商家 古籍书城

在文川网搜索古籍书城 获取更多电子书

辨國朝王復禮道院乃元時創建諸志何得以宋朱子詩附其後豈因句中有靈峯二字耶殊不知本集詩題原作過武夷應當入靈峯之下不當入道院之下也

和陽道院又名清微太和宮九曲之盡溪水分而復合中環爲洲因立道院元羽士彭日隆建張真人易名宮規模宏麗爲冲佑之亞內有清虛室諸景明永樂十四年悉爲洪水漂沒

寥陽殿在和陽道院今廢

太音閣朝元閣凝雲閣皆在和陽道院今廢

清虛堂雲堂皆在和陽道院今廢

宜晚亭在和陽道院今廢

齊雲亭溪南齊雲峯上今廢

香亭又名禱雨亭溪南仙巖今廢

白雲菴溪北靈峯上近時新構臨崖軒窻高敞憑闌遠眺溪自西來盤廻如帶星村之田疇廬舍野店山橋儼然如畫有石井極甘其地多紅梅

詩國朝僧明雲鈞簾舒眼界九曲景平分性靜依青嶂心空坐白雲多時徒夢想此日挹清芬石几筠床畔微言喜共君王復禮種樹佳名遠播聞寒香結伴